

## **Memorandwm Esboniadol i'r Rheoliadau Cofrestru Tiroedd Comin (Cyffredinol) (Diwygio) (Cymru) 2007**

Paratowyd y Memorandwm Esboniadol hwn gan Adran yr Amgylchedd, Cynllunio a Chefn Gwlad, ac fe'i gosodir ger bron Cynulliad Cenedlaethol Cymru.

### **Disgrifiad**

(i) Mae'r Rheoliadau hyn yn dirymu'r ddarpariaeth ar gyfer chwiliadau statudol o'r cofrestri tir comin sydd gan yr awdurdodau cofrestru tir comin. Bydd y chwiliadau statudol presennol yn cael eu disodli gan y trefniadau anstatudol presennol wedi'u haddasu.

(ii) **Materion sydd o ddiddordeb arbennig i'r Pwyllgor Is-ddeddfwriaeth.**  
Dim Materion

(iii) **Y Cefndir Deddfwriaethol**  
Awdurdodau cofrestru tir comin sy'n gyfrifol am gynnal a chadw cofrestri tir comin a meysydd trefi neu bentrefi o dan y Ddeddf Cofrestru Tir Comin 1965 ('Deddf 1965'). Cafodd swyddogaethau'r awdurdodau cofrestru eu hail-ddeddfu yn Rhan 1 o Ddeddf Tir Comin 2006 ('Y Ddeddf Tir Comin'), a bydd yn diddymu Deddf 1965 unwaith y daw'r darpariaethau perthnasol i rym yn gyfan gwbl.

Ar hyn o bryd, gall y sawl sy'n prynu tir neu eiddo preswyl gynnal chwiliad statudol o'r cofrestri tir comin gan ddefnyddio gweithdrefn a ddynodwyd yn rheoliad 32 o Reoliadau Cofrestru Tir Comin (Cyffredinol) 1966 (OS 1966/1471) ('y Rheoliadau Cyffredinol'), a wnaed o dan awdurdod Deddf 1965. Rhaid iddynt lenwi Ffurflen 21, a ddynodwyd yn Atodlen 1 i'r Rheoliadau Cyffredinol, a ddisodlwyd gan Reoliadau Cofrestru Tir Comin (Cyffredinol) (Diwygio) 1989 (OS 1989/2167), ac mae'n rhaid dychwelyd y ffurflen, ynghyd â'r ffi a ddynodwyd, at yr awdurdod cofrestru perthnasol.

Nid oes darpariaeth o dan y Ddeddf Tir Comin ar gyfer chwiliadau statudol o'r gofrestr a bydd Ffurflen 21 yn cael ei diddymu maes o law. O ganlyniad, cytunwyd i gynnwys cwestiwn newydd am y gofrestr tir comin ar Ffurflen CON 29 Rhan II (gweler isod).

Wrth wneud y Rheoliadau hyn, bydd Gweinidogion Cymru yn arfer eu pwerau o dan adran 19(1) o Ddeddf 1965, a ddatganolwyd i Gynulliad Cenedlaethol Cymru o dan Orchymyn Cynulliad Cenedlaethol Cymru (Trosglwyddo Swyddogaethau) 1999 (OS 1999/672) ac sydd bellach yn cael eu harfer gan Weinidogion Cymru drwy rinwedd Atodlen 11 i Ddeddf Llywodraeth Cymru 2006. Bydd yn rhaid gwneud y Rheoliadau hyn yn unol â'r weithdrefn negyddol ar gyfer cynnig.

(iv) **Diben ac effaith arfaethedig y ddeddfwriaeth**  
Caiff tir comin cofrestredig a meysydd trefi neu bentrefi eu diffinio gan y cofrestri tir comin sydd gan yr awdurdodau cofrestru. Mae'r cofrestri yn

dangos maint y tir comin a'r meysydd, ynghyd ag unrhyw hawliau tir comin y gellir eu harfer ar y tir (megis yr hawl i bori gwartheg).

Mae cofrestru'r tir yn cael effaith ar y defnydd y gellir ei wneud o'r tir. Er enghraifft, mae cyfyngiadau ynghlwm wrth dir comin cofrestredig mewn perthynas â 'gwaith' (megis codi ffensys) ac mae'n drosedd i adeiladu ar feysydd neu i amharu mewn unrhyw ffordd ar fwynhad eraill o feysydd. Mae'n bosibl, felly, y bydd pobl sydd am brynu tir yn dymuno gwneud ymholiadau (cyn prynu'r tir) i weld a yw'r tir wedi'i gofrestru – yn enwedig os yw'r tir mewn ardal wledig neu yn agos at dir comin neu faes cydnabyddedig.

Yn ogystal mae'n bwysig bod unrhyw brynwyr posibl yn gallu gweld statws y tir y maent yn dymuno'i brynu ac mae'r chwiliad statudol yn sicrhau bod hynny'n bosibl. Serch hynny, fel y nodwyd isod, bydd cyflwyno'r Ddeddf Tir Comin yn dod â'r chwiliadau statudol i ben ond, yn lle hynny, bydd yn cynnig dewis symlach anstatudol yng Nghymru a Lloegr. Yr amcan yw sicrhau bod ffioedd chwilio yn cael eu pennu ar lefel sy'n briodol i bob awdurdod heb yr angen am is-ddeddfwriaeth.

Mae Ffurflenni CON 29 Rhannau I a II yn ffurflenni anstatudol lle mae cynrychiolwyr awdurdodau lleol a throsgludiaethwyr yn cytuno i ddarparu'r wybodaeth a gedwir gan yr awdurdodau lleol yng Nghymru a Lloegr am ffi. Defnyddir y ffurflenni'n rheolaidd ar gyfer chwiliadau awdurdodau lleol mewn perthynas â phob achos o brynu tir neu eiddo preswyl. Caiff y ffurflenni CON 29 eu trafod yn bennaf gan y Gymdeithas Llywodraeth Leol a Chymdeithas y Gyfraith ac maent yn anstatudol. Nid oes gan Lywodraeth y DU nac ychwaith Lywodraeth Cynulliad Cymru rôl uniongyrchol mewn perthynas â chynnwys y ffurflenni.

Daeth y Pecynnau Gwybodaeth am Eiddo yn orfodol ar 1 Awst 2007 ar gyfer eiddo a roddwyd ar y farchnad ar y dyddiad hwnnw, neu ar ôl hynny. Cynlluniwyd y pecynnau i sicrhau bod y sawl sy'n gwerthu eiddo preswyl yn rhyddhau gwybodaeth angenrheidiol am yr eiddo dan sylw i brynwyr posibl. Bu'n rhaid gwneud diwygiadau i Ffurflen CON 29 yn sgil cyflwyno'r Pecynnau Gwybodaeth am Eiddo. Yn dilyn ymgynghoriad â Swyddogion Llywodraeth Cynulliad Cymru, manteisiodd yr Adran dros yr Amgylchedd, Bwyd a Materion Gwledig (Defra) ar y cyfle i gytuno ar gynnwys cwestiwn ychwanegol mewn perthynas â chofrestri tir comin ar y Ffurflen CON 29 Rhan II bresennol. Mae Rhan II yn cynnwys cwestiynau dewisol mewn perthynas â chwiliadau, cwestiynau nad ydynt yn cael eu hateb gan yr awdurdod lleol oni bai y'u dewiswyd yn benodol (a lle bo'n rhaid talu ffi ychwanegol mewn perthynas â'r cwestiwn ychwanegol a ofynnwyd).

(v) **Gweithredu**  
Gwnaed y Rheoliadau ar 4 Medi 2007 a bwriedir i ddynt ddod i rym ar 1 Hydref 2007. Bydd DEFRA yn dwyn Rheoliadau cyffelyb i rym ar ran Lloegr ar yr un pryd.

(vi) **Ymgynghori**

Ymgynghorwyd â'r rhanddeiliaid mewn nifer o wahanol gamau ers cyhoeddi *Datganiad Polisi Tir Comin* 2002 lle y gwnaeth Defra ei ymrwymiad cychwynnol i alluogi pennu ffoedd priodol ar gyfer chwiliadau heb yr angen am is-ddeddfwriaeth. Cytunwyd ar y trefniadau newydd ac fe'u datblygwyd gyda'r partneriaid sy'n gyfrifol am reoli'r ffurflenni CON 29, gan gynnwys y Gymdeithas Llywodraeth Leol, Cymdeithas y Gyfraith, Cyngor y Trosgludiaethwyr Trwyddedig a'r Cyngor Cyrff Chwiliadau Tir, ac mewn cydweithrediad a'r Adran Cymunedau a Llywodraeth Leol.

Cyflwynwyd y fersiynau drafft o'r cwestiynau newydd sydd i'w cynnwys yn Ffurflen CON 29 Rhan II i'r rhai a fu'n bresennol yn y Seminar Cenedlaethol ar Dir Comin ym mis Medi 2006, a chafwyd trafodaeth arnynt. Yr oedd cynrychiolwyr o nifer o fuddiannau cyffredin yn bresennol gan gynnwys awdurdodau cofrestru tir comin, tiffeddianwyr, aelodau o Grŵp Rhanddeiliaid Deddf Tir Comin Cymru a swyddogion Llywodraeth Cynulliad Cymru. Yn ogystal, anfonwyd briff i'r holl awdurdodau cofrestru tir comin yng Nghymru yn sôn am y newidiadau. O ystyried hyn, a chan gofio'r brys i ddiddymu Ffurflen 21, teimlwyd nad oedd gwir angen ymgynghori pellach.

(vii)

#### **Asesiad Effaith Rheoleiddiol**

Paratowyd Asesiad Effaith Rheoleiddiol ar gyfer y Mesur Tir Comin yn 2005. Mae canlyniadau'r Asesiad Effaith Rheoleiddiol hwn yn parhau yn ddilys mewn perthynas â chwiliadau. I gael copi, ewch i:

<http://www.defra.gov.uk/wildlife-countryside/issues/common/commonbill/pdf/full-ria.pdf>

Yr oedd yr Asesiad Effaith Rheoleiddiol yn nodi y gallai newid o chwiliadau statudol i chwiliadau anstatudol achosi amrywiaeth mawr yn y ffoedd a godir gan awdurdodau cofrestru tir comin, gyda'r ffoedd chwilio yn cynyddu i rai defnyddwyr y gwasanaeth. Yr oedd yr Asesiad Effaith Rheoleiddiol hefyd yn nodi y byddai'r newid yn hwyluso chwiliadau electronig (mae'n rhaid eu cwblhau â llaw ar hyn o bryd o dan y systemau unigol presennol), a byddai hefyd yn hyrwyddo mwy o ymwybyddiaeth o chwiliadau a mwy o ddefnydd ohonynt, gan felly lleihau'r tebygolrwydd nad yw prynwyr yn ymwybodol o statws y tir.

Pennwyd ffi o £14 ar gyfer cynnal chwiliad gan ddefnyddio Ffurflen 21 yn 2003. O dan Reoliadau Awdurdodau Lleol (Codi Tâl ar gyfer Chwiliadau Tir) 1994 (OS 1994/1885), mae'n ofynnol i awdurdodau cofrestru bennu ffi sy'n rhoi ystyriaeth i'w costau, ar gyfer y chwiliadau a wneir gan ddefnyddio ffurflen CON 29. Pan fo costau chwiliad wedi eu pennu ar lefel sydd y tu hwnt i'r ffi benodedig bresennol, barn Llywodraeth Cynulliad Cymru yw mai'r sawl sy'n comisiynu'r chwiliad ddylai dalu'r gost lawn, yn hytrach na threthdalwyr y dreth gyngor yn gyffredinol.

(viii)

#### **Manylion cyswllt**

Gerry Quarrell

Pennaeth, Y Gangen Mynediad a Nawdd Cefn Gwlad

Adran yr Amgylchedd, Cynllunio a Chefn Gwlad

Ffôn: 029 2082 3557